

Obraćanje prvog zamjenika visokog predstavnika Brucea G. Bertona povodom obilježavanja Dana Distrikta Brčko



Vrijedi izgovorena riječ.

Brčko, 08. marta 2016.

Dame i gospodo, građani Distrikta Brčko,

Zadovoljstvo mi je biti ovdje danas povodom obilježavanja 16. godišnjice Distrikta Brčko.

Također mi je zadovoljstvo što, pored čestitki za vašu godišnjicu, imam priliku da vam čestitam i na datumu koji će, bez sumnje, ostati upamćen kao historijski datum za ovu zemlju.

Petnaesti februar, datum kada je BiH podnijela zahtjev za članstvo u EU, ostat će upamćen kao prekretnica u njenoj poslijeratnoj historiji.

Svaka godišnjica je prilika ne samo za slavlje nego i za razmišljanje o vremenima koja su iza nas – o rezultatima, ostvarenjima i svemu onome što smo mogli uraditi bolje.

Uvjeren sam da napredak postignut u Brčkom u posljednjih 16

godina predstavlja uspjeh u smislu implementacije Dejtonskog mirovnog sporazuma. U prošlosti, Brčko je bilo svijetao primjer onoga što mi iz međunarodne zajednice stalno ponavljamo: kada postoji volja, postoji i način. Institucije Distrikta Brčko omogućile su da se nađu rješenja za pitanja i izazove na način koji se može koristiti kao primjer za ostatak zemlje.

Međutim, svi mi uviđamo da je napredak u Brčkom usporen i da to stanje mora da se mijenja.

Mi smo svjesni problema sa kojima se danas suočavaju građani Distrikta Brčko. To su isti problemi sa kojima se suočava i ostatak zemlje. I građani Brčkog, kao i ostali građani širom BiH, očekuju da njihovi izabrani lideri ostvare konkretne pozitivne rezultate.

Dozvolite mi da iskoristim ovu priliku da još jednom podsjetim članove Vlade i Skupštine Distrikta Brčko da se institucije Distrikta ne smiju držati taocima stranačke politike.

Tražimo da se održavaju sjednice institucija Distrikta i da predano rade u interesu građana i to odmah!

Vi ste izabrani da rješavate probleme, bez obzira koliko oni teški bili. Ako budete radili u pravcu postizanja zajedničkog cilja – što bi trebalo da bude unapređenje standarda građana u prosperitetnom Distriktu – moći ćete naći rješenja. Ja se nadam da će Brčko, zahvaljujući vašim naporima, još jednom biti primjer za ostatak zemlje.

Ne dozvolite da građani Brčkog izgube povjerenje u vas! Počnite održavati sjednice institucija bez daljeg odlaganja.

Želim vas uvjeriti da je međunarodna zajednica i dalje opredijeljena da radi zajedno sa vama, sa građanima Distrikta Brčko, i sa svim ljudima ove zemlje, kako bi se izgradila uspješna i prosperitetna demokratska zemlja, koja može zauzeti svoje mjesto u evropskoj porodici država.

Dozvolite da u zaključku uputim najljepše čestitke ženama Distrikta Brčko i ženama širom Bosne i Hercegovine povodom Međunarodnog dana žena.